

## Wáràgà mì JÚDÀ

<sup>1</sup> Nìno a ye tí Júdà, tí bòò mì Jézù tí Bìndi-Mbírì, delè tí ná'vìndí Jákòmò, ká kù cu wáràgà tí nó jì ndâ 'duù tí nó náa Mbírì cu 'bì wó mítí ndú, mbe kù 'vala 'do gbí tó bà zè tí mì Mbírì Buù, delè 'do gbí bà kpolo tí ndú mì Jézù tí Bìndi-Mbírì nò.

<sup>2</sup> Ye kù 'deke tí ye á jì Mbírì, máa yí 'ví nò yé ọọ yó, yí 'ví sì 'bí i 'ví ba muu yo lá, yí delè 'ví zè yo nìkì túkà'i.

### *Ndâ sú mbe nìbà i*

<sup>3</sup> Ndâ tó kómbe ye, àá táánò gbí njembí ye kpolo ma a có bà cu wáràgà jì yo gítí gbèè 'valá tí nó náa Mbírì je jì ndoo ta ndoo nò. Káa ye kpónó gù nò éno máa, kpóló-kpolo có a bà cu wáràgà tacó bà je wotí jì yo gítí bà tì muu yúco tí nó náa Mbírì táánò 'dè jì ndoo ta bà gbaànjé ngbé, máa ndoo kpolo tí tacó tí ndâ 'duù nò.

<sup>4</sup> Tacó ndâ 'bí vò 'duù ta Mbírì mì ndú wálá, náa à cu có gítí ndú mì gbí wáràgà mì Mbírì sàà gí, kpónó pomboo tí ndú gí gbí òkò tí ndoo ta ngiṅò gí. Ndú delè bè Mbe tí ndoo Jézù, tí Bìndi-Mbírì, tí gbèè Gba mì ndoo cuki nó gí.

<sup>5</sup> Yo tà kpétí má 'di có tí nó náa ye kpónó kèjì gí bà cu mí gbí wáràgà tí nó jì yo nó sàà kùro gí, go bà 'va mbí yo á gítí kuu tí ye, máa, Mbírì táánò 'vala ndâ 'duù mì ndâ Ìzìrìyélì ta bà kaa

ndú 'dáá gî 'do Másìrì gî, káa bìndi yí gii mìi ndâ 'duù ñinó mbe kpò có mì wó gî nó lée gî.

<sup>6</sup> Mbírì delè si ndâ basìlì tí nó mbe bàkà i ndii muu wotí tí nó náa yí táánò je ji ndú gî nó, me sínò lá. Yí eṛe ndú ta ñjì wú náa à jé bà kaṛa wálá nó, bìndi yí gii kpòlò tí ndú mì gbí 'dí'di'o yee tí o bà co ṛi mì Gbolò o bà waa có.

<sup>7</sup> Yo delè 'ví si mbí yo 'ví dù tí ndâ 'duù gbí ndâ gbata Sòdómà ta Gòmóra, ta ndâ 'bí gbata ñinó dè-dè rẹgbà tí ndú nò. Ndâ 'duù tí nò táánò gbètèkè tí ndú tí ña ñinó náa ndâ 'dakò kù sì ta ndâ ka ndú 'dakò. Káa Mbírì gii doo ndú ta wu ñinó jé mbe mee lá dúú bà ya tí nó, tacó wàa, ndâ 'duù 'dáá gî 'ví ñò ta ṛo ndú máa, bà waa có mítí ndâ mbe bàkà vò i ta wu á bìndi ku mì ndú kuu tí.

<sup>8</sup> Ndâ vò 'duù tí nò kù ṛi ṛii ká gítí ndâ vò i mbe kù si ndú 'ví volo tí ndú ta kpéetí ndú; ndú ñò Mbírì tí mbe wotí ṛo ndú tí i lá, ndú delè kù 'dè vò i gítí ndâ i gbírì.

<sup>9</sup> Káa à kpétí káa Mìkélè, tí gba mì ndâ basìlì mì Mbírì, yí táánò 'dè vò có gítí Gba-vò-i ta o tí nó náa ndú tò ta kponje ta yí muu ku Mòze nó lá; kòcò wó ji Gba-vò-i cuki ká éno, máa, «Mbe tí ndoo bà 'dè vò i ji wò!»

<sup>10</sup> Káa ndâ 'duù tí nò kù go ndâ i ñinó náa ndú ñò ndú ni lá nó 'dáá gî ká go; káa ndâ i ñinó náa ndú ñò ndú ni 'do tí bà ji tàmuu ndú, me ta bà koṛo có lá, go i mì ndâ nò ta muu tí ndú wálá nó, a ndâ i ñinó mbe kù volo ndú nò.

<sup>11</sup> Ndú bà ñò mítí ndú! Tacó ndú kù mèlè a ndi Kàyínò; ndú kù ṛu a ndi lókó-loko kpokèjì mì 'dakò tí nó tí Bàláámù táánò nó tacó bà 'de i

gbí i; ndú a ndâ mbe kû jòò gbí có ta Mbířì á go i mì 'dakò tí nó táánò ta ẹ̀ wó a Kórà nó, káa ndú bà mì go yí.

<sup>12</sup> Ndâ 'duù tí nò a ndâ zu 'duù gbí òkò tí yo ta o tí nó náa yo má kili ta bà muu yo kû zò i nô. I tí ndú a bà gbala gbí só ndâ niì ta nô ọ̀ ndú wálá. Ndú kû kořo có ká gítí miři ndú cuki. Ndú go kùlù mù mbe kû te gbí pípiři ta ngo mù gbí wálá; ndú go ndâ mú ñinó mbe ẹ̀ ta o bà ẹ̀ ndâ 'bí ka ndú ta bẹ̀mbìlì lá; ndú go ndâ mú ñinó náa à ndoo ndú ta tà teè ndú gî, ndú cì ta bà só.

<sup>13</sup> Ndâ i-nô mì ndú kû gbo pù go pù á muu ngo mbe kû ngbàngà gbí pù. Ndú kû nò ká sàkàmàà é̀nò, kû mà ngba ndú go ngba ndâ yii, káa Mbířì 'viindi bàndò bà dù ndú dúú bà ya tí , ù ta ndi ndú mí gbí 'dí'di'o ñinó njíkirií nó sàà gî.

<sup>14</sup> É̀nòkì tí bà vò-nje só bà 'dòkò bà jò tí bìndi Ádàmà táánò 'dè-kòcò gítí ndú máa, «Yo sè tù yo! Mbe tí ndoo gí ta ndâ basìlì mì wó me mbe go mbìlì tí 'bá

<sup>15</sup> gí bà waa có mì ndâ 'duù muu to tí nó 'dáá gî, gí bà waa có mítí ndâ 'duù tí nó ta Mbířì mì ndú wálá nó, tacó ndâ vò i mì ndú náa ndú kû bàkà nó, delè tacó ndâ vò có tí nó 'dáá gî náa ndú 'dè gítí Mbířì nô.»

<sup>16</sup> Ndâ 'duù tí nò a ndâ mbe kitiki có, ndú delè a ndâ mbe kaa có mí muu ndâ 'bí 'duù ndú a ndâ mbe kû ru káa ndi ndâ vò i ndú mbe ñikì ká tí ndú, ndú a ndâ mbe ngàà nje, ndú delè a ndâ mbe tořo bàà mítí có tacó bà 'de i do tí ndâ 'duù.

*Yo kpolo tí yo*

17 Káa mbí yo 'ví dù tí có tí nó náa ndâ tú mì Mbe tí ndoo Jézù tí Bìndi-Mbíri táánò 'dè ji yo nô, ndâ tó kómbe ye.

18 Kòcò ndú táánò ji yo éno máa, «Ndâ mbe kú ño ndâ 'duù, ta nèté mì ndú káa bà mòkò tàkò ndâ i muu to tí nó nó, bà oloko gí ọ ọ gí bà ño yo gbí ndâ ndòngbú sili tí nó kèjì nô.»

19 Ndú a ndâ mbe kú bàkà 'bè mí gbí òkò tí yo; à tí ndú káa go ndâ vò i muu to tí nô; Bèri-mì-Mbíri gbí njembí ndú wálá.

20 Káa yo tí ndâ tó kómbe ye, yo 'ví dù tí ndâ yú 'duù 'do gbí tó bà tee njembí yo mítí Mbíri ta ña wálá,

21 wàa yo 'ví dù tí ndâ 'duù ñinó náa Mbíri zè yo ñikì maa á kpónó si yo kú ùndi bà gí Mbe tí ndoo Jézù tí Bìndi-Mbíri tí mbe kú ñò yè ọ ndâ 'duù gí bà je 'válá ñinó mbe cee lá nó ji yo nô;

22 yo delè 'ví ñò yè ndâ 'duù ñinó mbe kú me wê-wê nô;

23 yo 'ví 'vala ndâ 'bí ta bà ọa ndú 'do gbí wu, wàa yo 'vala ndâ 'bí ta bà ñò yè ọ ndú; káa yo 'ví kpolo tí yo, máa, ndú 'ví e zì ndú mítí yo lá.

### *À ùlù Mbíri*

24 À ùlù Mbíri tí nó ta wotí bà 'vala yo 'do tí ndâ vò i á tí wó, tí mbe ya ta yo gí gbí ngba wó tí ndâ yè ta vò i mì yo wálá ta pétékè tàkòcò yo nô;

25 à ùlù gbèe Mbíri tí nó tí mbe 'vala yo ta rè mì Jézù tí Bìndi-Mbíri tí Mbe tí ndoo nó. Yí a ngba'o, yí a gbolò gba, yí a mbe to tí nô, yí delè a mbe wotí, yí sàà kuu tí á kùro bà suu to tí nô,

yí kpónó kuu tí , yí delè bà dù ká kpòò ya tí !  
Go-i-tí-nò.

**Ndogo**  
**Ndogo: Ngú bà toko nambeè mî Mbîrî ta ndâ 'duù**  
**New Testament**

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

---

PDF generated using Haiola and XeLaTeX on 16 May 2025 from source  
files dated 16 May 2025

14424ae9-b5af-591e-814e-49316d8d74aa